

## Pablo Corinto Anoafo Afianã Kirika Kenexô Fomani

### *Pablo Corinto anoafo yoisharani*

<sup>1</sup> Ëfe yora mĩshtichi, êkĩa Pablo. Ë kirika kenexô mato fomai mã tâpinõ. Nofeta Jesús Ifofamis Timoteo feta ã mato kirika kenexô fomai. Epa Niospa ea katopaiyaito Cristo Jesús ea katonĩ ãfe meka ã mato yoifofãfõfãinõ.

Nios chanĩmara faafo Corinto anoafo, Acaya mai anoafori ã mato keyokõĩ yoisharai.

<sup>2</sup> Ë nõko Nios mato kĩfixomis iskafakĩ: “Epa Niospa, nõko Ifo Jesús feta ato noikõikĩ ãto õiti inimamasharaxõfe. Askatari ato shara fafe,” ixõ ã matoõnoa yoimis.

### *Pablo omiskõini*

<sup>3-4</sup> Nõ Epa Nios yoisharanõ iskafakĩ: “Epa Niospa, mĩ noko sharafa fafãfãini. Mĩ sharafinakõia. ¡Aicho!” ixõ nõ Epa Nios yoinõ. Nãfi nõko Ifo Jesucristo ãfe Apaki. Nãatorĩ noko noisharakõĩ. Askatari nõ omiskõiaito noko inimamatiro. Akka nã nõ meemis keskara mei, fetsa omiskõiaito nõ inimamatiro, nã Epa Niospa nõ omiskõiaito noko inimamamis keskafakĩ.

<sup>5</sup> Cristo omiskõimakĩfinakõinifo. Nãskakãri nõri Cristoõnoax omiskõikõĩ. Akka Cristo omiskõiaito Niospa axosharakõini. Nãskakã Cristoõxori nokori Niospa axosharakõĩ.

<sup>6</sup> Akka nõ Niospa meka mato yoi nõ omiskõiaito mã noko nikakõixõ mã nõko Ifo Jesús chanĩmara faax mã afe isharakõitiro. Nãskax mã inimakõitiro.

Akka nõ mato yoi nõ omiskõifiaito nõko õiti Epa Niospa noko inimamaxomis. Akka mã mã noko õimis nõ omiskõiaito Epa Niospa noko axosharaito. Nãskarifiã mãri omiskõiaito Epa Niospa matori axosharakõixii mã tenesharakõinõ.

<sup>7</sup> Mã nõ tãpia nõ omiskõiai keskai mãri nofe omiskõiaito Epa Niospa nõko õiti inimama keskafakĩ matori inimamasharai.

<sup>8-9</sup> Efe yora mĩshtichi, Asia mai anoax nõ omiskõita ã mato yoi mã tãpinõ. Nõ omiskõifinakõita tenetiroma mei nai keskarakõi nõ meita. Nãskakẽ nõ tãpitiro nãskara Epa Niospa noko tãpimana nõã nõ ifimetiroma nõ omiskõiyamanõ. Epa Nios fistichi noko ifitiro. Akka nõ omiskõiaino nõ naano, nãatofi yorafo ofofatirokĩ, ixõ nõko shinã mẽraxõ nõ shinãita.

<sup>10-11</sup> Akka nõ fãsi omiskõi nakerafiaino Epa Niospa noko ifita. Anã afetiãra noko ifixii. Askatari nõ chanĩmara fakõini nokomãi ifitaifamiskẽ, mãmãi noko Epa Nios kĩfixomiskẽ. Mã noko askafaino nã Nios chanĩmara faa fetsafãfe shinãkĩ iskafaxikani: “Aicho Epa Niospa, mĩ Pablo yafi afe rafemisfo mĩ ato ifisharakõia. Mĩ fãsi sharakõi,” ixõ yora ichapafãfe yoixikani.

### *Afeskai Pablo kanimamẽ Corinto ano*

<sup>12</sup> Nã nõ fakira kafãsai ariax nõ isharakõimis, nõ afaa chakafamisma. Niospa fichipaiyai keskara nõ amis. Askatari mato mẽranoax nõ isharaifinakõimis. Nãskakẽ nõ shinãchakaima nõ inimasharakõi. Akka nõkai nõ mato pãramisma, chanĩma fisti nõ mato yoimis. Niospa noko noikĩ noko shinãmanaino nõ isharanõ mato mẽranoax. Askatari nã nõ fakira kafãsai ariax nõ isharakõimis.

13-14 Ĕ mato kirika kenexō manamani tãpitiropinĩ shara faxō fekaxma mã tãpitiro xafakĩa sharakōi. Nãskafekē atirifãfe tãpisharafoma ĩ afe keskaramãki. Nãskafixō mã tãpisharai, nãskara shara ĩ fichipai. Nãskakē nõko Ifo Jesús anã oaino mã nokoki ini-masharaxii, nõri matoki inimasharanõ.

15-16 Nãskakē ĩ shinã ĩ Macedonia ano kaitĩa ĩ mato ano mãpefaixii anã ĩ mato yoisharaxiki mãto õiti mẽra mã inimanõ. Askata nã Macedonia anoax ĩ oaitĩa anã ĩ mato ano mãpetiro mato fe iy-oxiki. Chipõ Judea ano ea nĩchitirofo, ixõ ĩ shinãni.

17 Nãnori ĩ shinãfiãx ĩ mato ari ĩ kayoikaima. Akka mã iskafakĩ shinãiraka: “Pablo ĩ kaira ifiãx kaima, ¿afeskakĩ noko pãramē?” ixõ mã shinãiraka. Akka ĩkai õiti ranãyama fetsa yoikĩ, fetsa yoikĩ ĩ fapanã. Nã yõra Jesús Ifofaamato shinãi keskara ĩ shinãima.

18 Nã Niospa noko pãramisma keskafakĩ nõrikai mato pãramisma. Nãskakē tãpisharakõia nõ mato pãramisma.

19 Akka Timoteo ikaino Silvano ikaino ĩ ikaino Jesucristo Niospa Fakeõnoa nõ mato yoimis. Jesucristo mekakai rafema, ãfe meka mẽstekõi. Chanĩma fisti.

20 Epa Niospa noko yoiyoa keskara keyokõi Cristo mã noko axomis. Nãskakē nõ keyokõichi yoimis iskafakĩ: “Epa Niosi, mã fãsi sharakõi. Jesúsxõ keyokõi mã afama mãshti famis nã mã yoiyoa keskafakĩ. Nãskakē Jesús aneõxõ nõ mia aicho fai,” ixõ nõ yoimis.

21 Askatari Epa Niospa mato yafi noko Jesús Ifosharakõifama. Nãskatari noko katoxõ noko nĩchini ãfe meka yoimis nõ inõ.

22 Akka fẽtsa ãfe afarafo marakka fatiro fetsafãfe

tāpinōfo āfenākē. Nāskafakīri Epa Niospa āfe Yōshi Shara nō mēra nanea aōxō nō tāpinō nō afe yoraxō. Nāskakē nō tāpitiro afara fetsa nā noko yoiyoa keskara chanīmakōi noko ināxii.

<sup>23</sup> Ē mato ari kaira ixō ē shināfiitaxakī ē kaama. Epa Niospa ea tāpikōia ē chanīkēma. Ē mato ari kakerana. Nāskafiax ē kaama ē mato shinākī. Ē ato ari kaxō ē ato fasi yoikī ē ato shināmitsamatirora ikax nāskax ē mato ari kaama.

<sup>24</sup> Ē mato askafatama ēroko mato inimama-paisharai. Ēkai mato ifo ipaima. Akka Jesús fisti nōko Ifo. Akka mā mā Jesús chanīmara faxō mā mā Jesús Ifo sharakōifai. Nāskakē ē mato feta Jesús yonoxopai mā inimai finakōinō, askatari mā Jesús Ifo sharakōifanō.

## 2

<sup>1-2</sup> Nāskakē ēfe shinā mēraxō shinākī ē iskafayamea: “Ē Corinto ari kapaifi ē kaima. Akka ē kaxō ē ato yoikī iskafapaima: ‘A mā afara chakafamis keskara xatekāfe,’ ixō ē ato yoikī ē ato inimamatiroma. Askakimaroko ē ato shināmitsamatiro. Ē ato shināmitsamanaino, ğtsōa ea inimamatiromē? Akka ares fisti ea inimamatirofo,” ixō ē shināyamea.

<sup>3</sup> Nāskakē ē mato kirika kenexona, mato ari kakīma. Akka ē shinā, “Ē ato ari kaxō ē ato iskafaino: ‘Mā isharakōiyama mato chaka xatekāfe,’ ē ato faino shināmitsakōitirofo,” ixō ē shināyamea. Akka mā ea nikayamaino ēri shināmitsakōitiro. Akka mā anā Nios nikakī anā isharakōiaino, mā ea inimamasharakōitiro. Akka mē tāpikōia ē inimakōiaino māri inimakōitiro.

4 Ë mato kenexokĩ ã meyamea ãfe õiti shinãmitsakõiaito oiayanã. Ëkai mato shinãmitsamapainima. Askatamaroko ã mato kenexoni a ã mato noikõiai keskara mã tâpinõ.

*Fẽtsa noko chakafaito nõ rae fatiro*

5 Akka nõ feronãfake fẽtsa ea chakafakĩ mekafakĩ ea fisti shinãchakamanama, nõ mã Nios Ifofaafari keyokõi mato shinãchakamana. Nãskakẽ noko keyokõi chakafakĩ mekafaa. Noko askafafiaino ãkai na feronãfake omiskõimaki finapaima.

6 Akka mã ranãrito omiskõimanakĩ nãskanõkãfe.

7 Akka a mã aka keskafakĩ anã askafakĩma rae fakãfe. Nãskaxõ yoisharakãfe inima-masharaxikakĩ anã omiskõinõma. Akka mã askafayamaino ãfe shinã mẽra shinãmitsakõitiro anã shinãsharatiroma anã Nios Ifofapaima.

8 Nãskakẽ ã mato yoiyai keskafakĩ ea nikasharakãfe. “Nõ mia noikõi. Mĩ anã nofe isharakõitiro,” ixõ yoikãfe tâpinõ.

9 Ë mato kirika kenexõ manamayamea tâpipaikĩ mã mẽxotaima ea nikakõimãkai.

10 Mã fetsa raefakẽ ãri nõ raefatiro. Fẽtsa ea chakafaito ã mato shinãkĩ Cristo ea õiaino ãri nõ raefatiro.

11 Nõ fetsa raefasharakõiaino Satanás noko feparatiroma. Nõ tâpisharakõia Satanás noko kexepaikõi. Akka a Nios Ifofaafõ isharayamaino, raefayamaino, a Nios Ifofaafõma tiito chakafakĩ mekafatirofo Satanás fichipaiyai keskara. Akka nõ fetsa raefaino Satanás noko afeskafatiroma.

*Pablo pexe rasi Troas ano nokoax inimanima*

12 Akka ã mato eõnoa tãpimapai. Ë pexe rasi Troas ano kani meka shara Cristoõnoa ato yoikai. Cristoõnoa nikapaikõinifo. Nãskano nõko Ifãfe ea atoki nĩchini ã ãfe meka ato yoinõ.

13 Akka ã shinãni nofe yora Tito Troas ano ã fichikaira ixõ. Akka fichiyamax ã inimanima. Nãskaxõ ã fãsi shinãkõini. Nãskata, “Mẽ kai,” ixõ Troas anoafõ nã nõko Ifo chanĩmara faafõ ã ato yoita ã oni nono Macedonia ano.

*Cristoõxõ nõ keyokõi finõtiro*

14 Aicho Epa Niosi, mĩ Cristo Jesús afara chaka potamana anã afeskafanõma. Nãskakẽ nõri afe inimai nõmãi aõxõ ãfe meka yoikatsaxakĩ yorafãfe tãpinõfo. Akka pirofomã nakas shara nachikomea nõ keyokõichi xetetiro keskafaki, nãskafakĩri Niospa noko nĩchiano nokoõxõ keyokõichi tãpitirofo ãfe meka shara.

15 Akka nõ meka shara Cristoõnoa yoimis keyokõichi nikanõfo. Akka atirifãfe chanĩmara fakõikani, Nios fe ipaxakakĩ. Akka atirifãfe nikasharakanamax Jesús Ifofakanamax nakanax omiskõipakenakafo.

16 Akka na meka shara nikaifoma mã nakanax omiskõipakenakafo mẽra fokanax omiskõixikani, nãfãfemãi na meka shara nã nõ afara pisikõi xetemis keskara xetekatsaxakakĩ. Akka nã meka shara nikaifãfe nã nõ pirofomã nakas shara xetemis keskara xetemisfo. Nãskakanax Nios fe nĩpanakafo. Akka, ¿tsõa Niospa meka Jesúsnoa yoisharatiromẽ? Akka tsõa atiroma.

17 Akka fetsafãfe Niospa meka ato yoikakĩ kori fipaikani ãa ato pãrakaxõ. Nõ mato Niospa meka yoikai noko kopifakãfe ikaxõ ãa ato pãrakaxõ ato

kori fīaifo keskafakī nōkai mato askafamisma. Mā nō tāpia nō āfe meka yoiaito Epa Niospa noko ōisharakōi, nāatomāi noko nīchinixakī. Āfe meka yoikai nō kaxetiroma, Niospamāi noko ōiaino nōmāi Cristo āfe inaxō.

### 3

#### *Jesús ato meka fena yoimis Pablo ato yoini*

<sup>1</sup> Askara nō yoiaino, mā shināiraka nā nōa nō yoimesharai keskara. Maa. Nōa nō yoimesharaima. Mā chaka shināi. Akka fētsa yonopaiyaito fētsari fetsa kirika kene fomaxotiro fetsafāfe ōinōfo yonosharamiskē. Akka, ĵmā shināimē fetsafāfe nokoōnoa kirika kenenōfo noko yoisharakakī nō yonosharamiskē Niospa meka yoikī? Akka nō askara fichipaima. Akka, ĵmā shināimē nō mato kirika kene yōkaito kirika kenexō mā noko inānō nōri fetsafo inānō noko tāpinōfo nō mato mēraxō yoisharamiskē? Maa. Askara nō fichipaima.

<sup>2</sup> Akka nā kirika kenea keskara nō fichipaima māmāi nā kirika kenea keskarakē, fetsafāfe mato ōitirofo māmāi Nios Ifofasharakē. Mato ōikakī nokori tāpitirofo nō Niosxō yonosharamiskē.

<sup>3</sup> Akka mā mā isharakōia anā mā imis keskarama a Niospa fichipaiyai keskaraino. Nā noko ōimana Cristo māto ōiti fetsafaa fena keskara mā inō. Nāskakē mā kirika kenea keskara. Mato ōixō fetsafāfe tāpitirofo nō Niospa meka mato tāpimasharamiskē. Akka na kirika kene lapisi kenemeama, askatari tokiri sapaki kenemeama; Epa Nios nīpanakato āfe Yōshi Sharapa mato imashara mā isharakōinō.

<sup>4</sup> Iskafakī nō yoia, mā nōmāi tāpīxō Niospamāi noko nīchinikē nō āfe meka mato yoinō Cristo āfe sharaōxō nō mato yoisharamis.

<sup>5</sup> Akka nōa nō afara shara nō mato yoitiro ma mā isharanō. Askatamaroko Epa Niospa āfe Yōshi Sharaōxō nō fetsafo tāpimatiro isharanōfo.

<sup>6</sup> Niospa Yōshi Sharaōxō na meka fena nō ato yoimis Jesúsnoa nō Nios fe nīpaxatiro. Akka a Moisés keneniōnoa nō ato tāpimamisma, sharafiano keyokairoko nikanōfo nō ato yoipanā. Akka a Moisés yoini keskara keyokōi nikakanamax Nios ika ano katiroma. Askatamaroko Niospa Yōshi Sharapa noko imasharapakenaka Nios ika ano nōmāi Cristo Ifofakē.

<sup>7-8</sup> Epa Niospa nōko xinifo israelifo nā ato yoipaiyai keskara ato yoini nikanōfo. Tokiri pāraki kenexō ato yoini. Epa Niospa Moisés tokiri kene ināino luz keskara fafekōini. Nāskatari Moisés femānā fafekōini. Nāskakē mā Moisés māchi keya ariax fotokē nōko xini israelifāfe ōtiro ma inifo. Nāskax fafekōifiax fenāmāshta matapakeni. Akka Epa Niospa Moisés yoini keskara sharakōifixō noko imapakexatiroma. Sharakōifixō, akka iskaratīa Niospa Yōshi Sharapa noko yoiai keskara nāroko sharafinakōia.

<sup>9</sup> Akka nā Moisés yoini keskara sharafiano nikakanamax nakanax Nios ika ano katiroma. Akka iskaratīa Niospa āfe Fake Jesúsxō noko chaka soaxotiro nō afe isharpakexanō. Nā sharafinakōia afaa fetsakai askarama.

<sup>10</sup> Epa Niospa Moisés yoini keskara sharafiax, akka Epa Niospa Jesúsxō noko axoni keskara nāroko sharafinakōia.

<sup>11</sup> Niospa meka shara Moisés fiaino



fafesharakōini. Mā fiāx āfe femānā fafesharakōini, Moisés. Āfe femānā fafesharakōifiax fenāmāshta matapakeni. Epa Niospa Moisés yoini keskara sharafiax, akka Epa Niospa Jesúsxō noko axoni keskara keyonakama nāroko sharafinakōia.

<sup>12</sup> Nāskakē mā nō tāpikōia Epa Niospa Jesúsnoa yoini keskara keyonakama. Nāskakē ranotama nō Jesúsnoa yorafo yoitiro.

<sup>13</sup> Nōkai Moisés keskarama. Moisés āfe femānā fafeaino samapa feopomeni israelifāfe ōinōfoma nāskax fenāmāshta matapakeni.

<sup>14</sup> Akka nōko xinifāfe nikasharapaonifoma, āto ōitimāi fēstokōi keskarakē. Iskaratīari nōko kaifo nāskarafori. A Moisés ato yoini keskara ato kirika anexonaifono ato nikakaspakanax. Nāskakaxō Epa Niospa meka tāpisharatirofoma. Akka Cristo fistichi ato shināmatiro nā ōiti fēstoa keskara inōfoma.

<sup>15</sup> Iskaratīari nā Moisés yoini keskara ato anexonaifono āto ōitimāi fēstokōiano shināsharapanāfāfe.

<sup>16</sup> Askafikaxō iskaratīa a Moisés keneni keskara anā shinākaxoma nōko Ifo chanīmara fakaxō aōnoa fisti shinātirofo. Nāskakē anā feopomea keskara ixikakima.

<sup>17</sup> Niospa Yōshi Shara nō Ifofaax nofe ikaino afaa fetsa nōko ifo itiroma, noko ikixikī.

<sup>18</sup> Akka nōko ōitikai fēstoa keskarama. Nōko Ifāfe āfe meka nō nikasharakōitiro. Āfe Yōshi Sharapa noko ikixō noko fetsafatiro a keskara shara nō inō. Akka mā noko fetsafaano nō sharakōi ixii. Nāskakē fetsafāfe noko ōikakī tāpitirofo nō shara isharakē. Nā feisiti xinī chaxaino fafeai keskara noko ōikakī nōko Ifo Jesús tāpitirofo afe keskaramāki.

## 4

<sup>1</sup> Akka Epa Niospa noko shinākī noko yoini āfe meka shara Jesucristoōnoa nō yoifofāfofāinō. Nāskakē nō shināchakaima, nō Niospa meka yoiki xateima.

<sup>2</sup> Nāskakē nō afaa one chakafamisma rāfixikima, a afara one chakafamisfo keskafakī. Askatari nō tsoa pāramisma. Askatari nōa nō Niospa meka fetsafaxō yoimisma. Akka Niospa tāpia meka chanīma fisti nō yoimiskē. Nāskakē mā nokoki inimasharapainō, nā nō afarafo shara faito ōi.

<sup>3</sup> Na meka shara Jesúsnoa nō yoimis nikakaspaifono nā onea keskara. Nāskakē tāpikanamax oa fēstoā keskarāfo. Nāskakanax omiskōipakenakafo.

<sup>4</sup> Nāfofi nā niafaka chaka āto ifoxō ato yoimis. Nāskaxō nā ōiti fēstoā keskara ato faano na meka shara Jesúsnoa tāpitirofoma. Nā yora fēxō luz ota sharafiano ōitiroma keskarāfo. Nāskaraxori Jesús finakōia tāpitirofoma. Nāskatari tsōa tāpitiroma Jesús Apa keskara sharafinakōifiano.

<sup>5</sup> Akka nōkai nōa nō nokoōnoa nō mato yoimisma mā noko ifofanō. Askatamaroko nō mato yoimis Jesucristo māto Ifo inō. Nōko Ifokē aō noixō nō yonoxosharapai. Akka nō mato axosharapai Cristoōnoa mā tāpinō.

<sup>6</sup> Niospa pena onifayoxoma fakishkē yoini pena inō. Nāskarari nō Jesús Ifofayamax nōko ōiti nā fakish keskara chakakōi ipaoni. Akka Niospa Jesucristoōxō nōko ōiti mēra noko chaxamashara aōxō nō tāpinō afe keskara sharakōimāki.

*Pabloyoini nō Jesús chanīmara faax nō isharatiro*

<sup>7</sup> Akka nō afaayamafekē Niospa āfe sharakōi noko mēra nanea nō āfe meka shara Jesúsnoa ato

yoinō. Akka nā kesho noko keskarari akai afaama. Samama moshitiro. Moshifitirokē a mēra afara sharakōi nō nanetiro. Nāskarifiāi nō afaayamafiano Jesús nofe rafea. Nāskakē yorafāfe tāpitirofo Niospa Yōshi Shara nōmēra nanea.

<sup>8</sup> Nā nō imis keskara iskaratīa ē mato yoinō mā tāpinō. Noko chakafafiakakī noko xatemakanima. Nāskafixō nō afeskaimēti ixō, nō shināchakafikī mā nō tāpia Epa Niospamāi noko axosharafafainaito.

<sup>9</sup> Noko noikaspakakī noko chakafapaimisfo. Nāskakaxō noko chīfafofāsafamisfo. Noko askafafi-aifono Epa Niospa noko potaima. Nāskakatari noko retepaikakī noko tsefeya fafiafono Epa Niospa noko kexesharamis nō nayamanō.

<sup>10</sup> Jesús niyoano retepaipaonifo keskafakī nokori nāskari fakani retepaikakī. Noko retepaifiaifono nōko Ifo Jesús noko kexesharai noko retenōfoma. Nāskakē yorafāfe tāpitirofo mā Jesús nafianixakī anā otoax nikē.

<sup>11</sup> Nō Jesús yonoxonaito mēxotaima noko retepaikani. Akka noko retepaifiaifono nōko Ifo Jesús noko kexesharai noko reteyamanōfo. Akka nōa nō ifimetiroma nayamaxiki. Nāskakē tāpitirofo mā Jesús nafianixakī anā otoax nofe ikē.

<sup>12</sup> Nāskakē Jesúsnoa nō mato yoimis fetsafāfe noko retepaifiaifono mā chanīmara faax mā afe ipaxanō.

<sup>13</sup> Akka Epa Niospa meka kirika ano yōra keneni iskafakī: “Ē Epa Nios chanīmara fakōini. Nāskakē Niosnoa ē ato yoi,” ixō kirikaki Niospa meka keneni yōra. Nāskarifiakī nōri Niospa meka chanīmara fakōixō nō mato yoi.

<sup>14</sup> Akka mā nō tāpia nōko Ifo Jesús mā nafiakē Ēpa

Niospa anã õtofani afe ãpaxanõ. Nãskakẽ Apa Jesús otofani keskafakĩ mato yafi nokori otofaxii nõ afe ãpaxanõ.

<sup>15</sup> Akka nõ omiskõikõi mato Epa Niospa meka yoi mã ãfe meka chanĩmara fakõinõ. Nãskakẽ yora ichapafãferi Epa Nios nikakõikaxõ, “Aicho, Epa Niosi, mã fãsi sharakõi,” faxinõfo.

<sup>16</sup> Nãskakẽ nõ omiskõifikĩ nõ shinãchakaima. Nõko Ifokai nõ kachikiri faima. Akka nõko yorari anã kerexma nõ omiskõiaino. Askafixõ nõko shinã mẽra mẽxotaima noko kerex fafafaĩni.

<sup>17</sup> Akka a nõ niyoax nõ omiskõiyoai akai afaama, samamashta keyoi. Akka nõ Jesúsnoax omiskõiaito a noko sharakõi imai a keskarakai tsõa õiyomisma. Nãfori keyonakama.

<sup>18</sup> Akka nã nõ omiskõiai shinãtamaroko nã nõ õiyomisma nõ shinãi. Nios ika anoxõ noko ini-mamapakenaka. Nãa nõ shinãi. Akka nã afaranã noko omiskõimanai samama keyoxii. Akka a Niospa noko chipo imai keskara keyonakama.

## 5

<sup>1</sup> Akka ã mato yoinõ nikakapo. Pexe xiniax pão ikax keyotiro. Nãskarifiãi nõ naino nõko yora keyotiro anã nõko fero mẽsho nõ mẽra inõma. Akka tsõakai noko yora fenafaxotiro. Epa Nios fistichi noko yora fena onifaxotiro. Akka mã nõ nai mẽra kaax nõko yora fena shara ixii. Epa Niospa noko yora fena shara faxõano a anã keyonakama.

<sup>2</sup> Akka nõ fekaxtemis nõko yora fekaxkõimeĩ. Nõko yora fenashara fapãi nai mẽraxõ.

<sup>3</sup> Akka nõ naax, ¿nõko fero mẽsho yoraya itiro-mamamẽ? Maa. Epa Nios fisti nõ Ifofamiskẽ noko

yora fena shara faxotiro nõ afe ãpaxanõ. Nãskakẽ nõko fero mẽsho yoramais nai mẽranoax itiroma Epa Niospamãi noko yora fena faxõano.

<sup>4</sup> Iskaratãa nono mai ano niyoax nõko yora omiskõiyoi. Askafiax nõ nayopaima. Nõ nayoamano Cristo onõ noko yora fetsafaxoxiki nõ isharapakexanõ.

<sup>5</sup> Nã Epa Nios fistichi noko onifani nõ afe ãpaxanõ. Nãskakẽ ãfe Yõshi Shara nõ mẽra nanea nõ tãpinõ noko yora fetsa faxoxiaino.

<sup>6</sup> Nãskakẽ nõ shinãsharafafãini nono mai ano niyoxõ, nayoxoma, nõko Ifo Jesús ari kayoxoma mã nõ tãpia.

<sup>7</sup> Nãskakẽ nã Jesús ika ano õiyamafikĩ nono mai anoxõ nõ chanĩmara fafafafãini. Nãskaxõ chipo nõ õixii Epa Niospa noko fetsafaano.

<sup>8</sup> Akka mã nõ tãpisharakõia Epa Niospamãi noko yora fetsa inãino. Akka mã nõ nakĩ nõko yora nõ ratafainikai nõ sharafinakõia ikikakĩ. Nãskakẽ nõ inimasharakõi mã nõ nai nõko Ifo Jesús femãi nõ ikikai.

<sup>9</sup> Akka nono mai ano nõ niyoxõ nõko Ifo nõ yonoxosharayopai nokoki inimanõ. Nãskatari nai mẽraxori na fischisharapaiyai keskafakĩ nõko Ifo nõ inimamapaisharakõi.

<sup>10</sup> Akka nã chanĩmara fafo tii Cristoki nokoxikani. Nãskatari noko yoipakexii nono mai ano niyoxõ nõ shara famismãkĩ, askayamakĩ nõ chakafamismãki. Akka nõ afara shara famiskẽ afara sharakõi noko inãxii. Akka nõ afara chakafamiskẽ afara shara noko inãpaifikĩ noko inãxima. Nãskakẽ nõ fixiima. Nãskakẽ Jesúsxõ nõ yonopai sharakõi.

*Pablo yoini Cristoõnoax nõ Nios fe rafetiro*

<sup>11</sup> Akka Niospa noko yoia keskara nõ ayamax nõ rãfitiro. Nãskatari fetsafori nõ ato yoipai nõ Niospa ato yoiai keskara anõfo. Niospa noko tãpikõia nõmãi mẽstekõi yoiaito. Nõkai ato feparapaima. Mãri mã mã noko tãpikõia nõ mato pãramisma. Nõko meka mẽstekõi fisti nõ mato yoimis. Nãnori fisti mãto shinã mẽraxõ mã shinãpainõ.

<sup>12</sup> Akka kakapai nõa nõ yoimesharapaima. Akka mẽstekõi fisti nõ mato yoimis, mã mã tãpia. Akka fetsafãfekai mato yoikõikanima mato feparapaikani. A yoiaifo anorikai yoimisfoma ãa ãto shinã mẽraxõ shinãkaxõ yoimisfo kakapaiyanã. Akka nõfi mato pãramisma, chanĩma fisti nõ mato yoimis. Nãskakẽ mã nokoki inimakõimis. Nãskaxõ mã nokoõxõ ato yoikĩ nokoõnoa mã ato yoisharatiro.

<sup>13</sup> Chanĩma, nõ Nios noikĩ kerexkai nõ yonox-ofafãimis aõnoa fetsafãfe nikasharanõfo. Akka yorafãfe nokoõnoa yoimisfo iskafakakĩ: “Na Pablo feta yonomisfãfe shinãsharamisfoma mẽxotaima ato Niospa meka yoifofãsafamisfo omiskõifinafikakĩ,” ixõ noko yoimisfo. ãa noko askafanõfokĩ mã nõ tãpiakĩ Niosxõ nõ yonofikai mã ãfe meka tãpinõ. Akka nõ mẽstekõi shinãsharakĩ nõ mato yonox-osharamis.

<sup>14</sup> Cristo noko noikĩ noko yoini nõ ãfe meka shara mato yoinõ. Cristo keyokõi yorafoõnoax naani. Nãskakẽ mã nõ naa keskara a nõ iyopaoni keskara ixikima.

<sup>15</sup> Akka mã Jesús nayoni yorafoõnoax keyokõi a keskara shara ixiki. Nãskakẽ a nõ chaka ipaoni keskara ixiiima. Nãskakẽ mã nõ apaiyai

keskara fisti anã nõ shinãtirioma. Cristoõnoax nõ yonosharaxotiro. Cristo ãa nokoõnoax nayoni. Nafiano Epa Niospa ãfe sharaõxõ anã otofani.

<sup>16</sup> Akka nõ Jesús chanĩmara faafãfema fetsafoõnoa shinãifo keskarakai nõ anã atoõnoa anori shinãpakenakama. Nõri anori shinãyopaoni nõ anã askapaima. Cristoõnoari nõ chakakõi shinãyopaoni. Nõkai anã aõnoa anori shinãima.

<sup>17</sup> Nãskakẽ Cristo nõ Ifofaafõ ato shinã fetsafaxõa anã shinãyopaoni keskara inõfoma, fena keskara shara inõfo. A Niospa fichipaiyai keskara fena keskara nõ ixii. Keyokõi fena keskara ixii.

<sup>18</sup> Epa Niospa Cristoõxõ noko fetsafaa anã nõ noikaspãnõma, nõ afe rafenõ. Askatari noko yoini aõxõ ãfe meka nõ ato tãpimanõ Epa Nios fe rafenõfo.

<sup>19</sup> Epa Niospa Cristoõxõ keyokõi yorafo afe rafemapai anã noikaspãnõfoma. Cristomãi noko nãxonikẽ Epa Niospa a nõ afara chakafamisnoa anã shinãima. Nã Epa Niospa noko yoia keskafakĩ nãnorikõi nõ mato yoimis.

<sup>20</sup> Akka Cristo noko nõchini nõ ãfe meka mato yoinõ. Nõ ãfe meka mato yoi nõ Epa Niospa mato yoiyai keskara. Epa Niospa nokoõxõ mato yoi nõ Cristo mato yoipaiyai keskafakĩ. Nãskakẽ nikakõikãfe Cristo mato nãxonikĩ mato chaka soaxoxiki. Nãskakẽ Cristo Ifofaxõ mato chaka xatekãfe Epa Nios fe rafexikakĩ.

<sup>21</sup> Akka Cristo afaa chakafapaonima. Nãskafikẽ Apa Niospa nõko chakafo akiki nõchini. Cristo afaa chakafayamafiakatsaxakĩ noko nãxoni Epa Niospa noko omiskõimayamanõ. Nã yora chaka keskarax nõko chakafoõnoax Jesús nani. Nãskakẽ nõ Jesús

Ifofaino Niospa noko òitiro sharakõi nã nõ afaa chakafamisma keskara, nokoki inimakõikĩ.

## 6

<sup>1</sup> Akka nõ Nios feta yonomis ãfe meka mato yoikĩ. Nãskakẽ nõ mato yoisharapai Epa Niospa mato noisharakõiaino, mã shinãmakiyamanõ, ãfe meka mã kachikiri fayamanõ. Fetsafãfe anorima mato yoiaito nikayamakãfe. Askatamaroko Jesús meka shinãmakiyamakãfe.

<sup>2</sup> Taeyokĩ Niospa meka yoimisto kirika keneni iskafakĩ Niospa yoiaino:

Ë mato shinãito, mã ea yoiaino ã mato nikai mã omiskõiaino. Ë mato ifinõ, ã mato axosharaxiki, ixõ yoini Epa Niospa. Nãskakẽ nikasharakãfe iskaratĩari Epa Niospa noko axosharapai noko ifixii.

<sup>3</sup> Nõkai mato afaa chaka yoipaima tsõa noko chakafayamanõfo. Akka nõ chaka niaito õikaki a Nios chanĩmara faamafãfe noko mekafatirofo. Nãskakẽ nõ afaa chakafapaima.

<sup>4</sup> Akka nã nõ keyokõi Niosxõ aka keskara nõ mato õimamis nõmã yonoxokatsaxakĩ. Noko omiskõimafiaifono nõ tenekõimis. Askatari fekaxteifinakõita nõ tenekõimis. Noko chakakõi famisfo, noko askafafiaifono nõ tenekõimis.

<sup>5</sup> Nãskakaxõ noko koshamisfo, askatari karaxa mẽra noko ikimamisfo. Nãskatari yora chakafãfe noko noikaspakakĩ fãsi noko mekafamisfo. Noko askafafiaino fekaxtekõiyã nõ yonomis. Askatari nõ oxa tenekõimis. Nãskaxri nõ fonãikõimis.

<sup>6-7</sup> Noko askafafiaifono afaa chakafatama nõko òiti mẽraxõ nõ afaa chaka shinãima. Nõ Cristo fe



rafeaito nã noko yoimis keskara mã nã tãpia. Noko chakafafiaifono nã atoki õitifishkitama. Fena fenakima nã tenekõimis. Nãskax fetsafo fe rafepaikĩ nã ato sharafa fafafaĩmis Niospa Yõshi Sharaõxõ nã ato askafamis ato pãrakĩma nã ato noikõimis. Nõ askakĩ keyokõi nã mato õimatiro nõmãi Niospa yonomatixõ. Satanás noko afara chakafamapaifi-aito Niospa Yõshi Sharapa nã Nios keskara shara noko imaino ãfe Yõshi Sharaõxõ nã afara chaka potatiro.

<sup>8</sup> Akka fetsafãfe nokoõnoa meka shara yoifiaifono fetsafãferi nokoõnoa meka chaka yoimisfo. Akka fetsafãferi na yorafo sharakõira noko fafiaifono fetsafãferi noko ãchamisfo. Nõ chanĩmakõi yoifimiskẽ noko feparamisfo ixõ nokoõnoa fetsafãfe yoimisfo.

<sup>9</sup> “Pablo fe rafeakai tsoama. Nõkai ato õimisma,” noko fafiaifono akka fetsafãfe Nios Ifofakõikaxõ noko noikani. Nãskatari nã napaiifax nã nia. Noko omiskõimafiakakĩ noko tsõa reteama.

<sup>10</sup> Akka nã shinãmitsafiaito nõko Ifo Niospa noko inimamamis. Akka afaamaisfixõ nã Niosxõ nã fetsafo imasharakõimis, Nios Ifo shara faifono. Nõ afaamais keskarafix nã aya a Niospa noko inãi. Akka nã keyokõi Niosnã nõkonãri.

<sup>11</sup> Efe yora mĩshtichi Corinto anoafãfe, nã nõko õiti mẽraxõ nã shinãi keskara nã mato yoimis. Nõ mato fomãmisma. Keyokõi nõko shinã mẽraxõ nã shinãi keskara nõ mato yoimis mã tãpinõ.

<sup>12</sup> Akka nã mato noikaspamisma. Akka mãroko noko noisharamisma.

<sup>13</sup> Akka iskaratĩa ã mato yoi ãpa fake noisharakĩ yoitiro keskafakĩ, nokori noisharakãfe nã nõ mato noiai keskafakĩ.

*Nã Nios chanĩmara faafãfema akaifo keskara ayamakãfe*

<sup>14</sup> Nã Jesús chanĩmara faafoma fe rafeyamakãfe. Akka na yora Nios Ifofaafãfe shinãifo keskarakai nã yora chakafãfe shinãkanima. Nãskarifiyai pena fe fakish osinãtiroma.

<sup>15</sup> Nãskarifiakĩ Cristo feta Satanás anoris shinãtirofoma. Akka nã Cristo Ifofaafãfe fichipaiyaifo keskara nã Cristo Ifofaafãfema askara fichipaikanima.

<sup>16</sup> Nã Cristo chanĩmara faafãfe ichanãmisfo Epa Nios kĩfinõfo. Akka nã Ifofaafoma ato fe ichanãtirofoma afara nimofa fakaxõ kĩfitirofo na nõko niosra ikaxõ. Nãskakẽ nã rafe osinãtiroma. Akka afãfekai Epa Nioskõi kĩfipaikanima. Akka Epa Nios nõ mēra ika. Nãskakẽ nõ Niospa pexe keskara. Nõko Nios nia. Epa Niospa yoini iskafakĩ:

Ëfi ato fe ikikai, ato fe rafexikĩ. Ë ãto Nios ikaino afo efe yora ikani, ixõ yoini.

<sup>17</sup> Askatari Epa Niospa yoini iskafakĩ:

Akka nã Cristo chanĩmara faamafãfe akaifo keskara ayamakãfe. Ato fe rafeyamakãfe afaa chakafaxikãkima. Mã askaino ã mato ifikai, ixõ yoini.

<sup>18</sup> Askatari nã afama mĩshti atiroto ato yoini iskafakĩ:

Akka ã mato Epa ixii. Akka mã ãfe fakefo ixii, ixõ nõko Ifo Niospa yoini.

## 7

<sup>1</sup> Ëfe yora mĩshtichi, Epa Niospa nã noko yoiyoni keskara shara. Nãskakẽ nõ isharonõ keyokõichi

nōko chaka nō xatenō. Afarafāfe nōko yora iya-mai nōko ōiti mēraxō noko chakafamatiro nāfo nō xatekōinō sharakōi ixiki. Nō Epa Nios noikōiax a keskara shara nō ipai.

*Corinto anoxō chaka shināyopaonifo. Akka iskaratīa mā shara shinākani*

<sup>2</sup> Akka nā yora fisti keskara nō inō noko noisharakāfe. Nōkai mato chakafamismaki. Askatari nō mato afaa chakafamamisma, askatari nō mato pāramisma.

<sup>3</sup> Ēkai nā ē mato yoiyai keskafakī mekakī chakafakī ē mato yoimisma. Akka ē nayoxoma ē mato mēxotaima noikōifafāini. Nāskatari mē nafiaxō mēxotaima ē mato noikōixii. Nāskakē tsōa noko paxkanā fatiroma nā yora fisti keskaramāi nō ikē.

<sup>4</sup> Mā nō tāpikōia mā noko noikōiyanā, mā Jesús Ifo sharakōi fakē. Nāskakē nō yorafo yoimis mā isharakōimiskē. Nāskatari nō omiskōifi nō inimakōimis.

<sup>5</sup> Akka nā nō Macedonia ano nokoitatīa nō te-neama, mēxotaima fanīma mīshtinoax fekaxteaifāfe ōi. Akka nō shināchakakōimis. Askatari a Nios Ifofaa fetsafori nō ato shinākōimis, mā nōko Ifo Jesús kachikiri faafora ixō.

<sup>6</sup> Akka nā shināmitsaifo Niospa ato inimamamis. Nāskakēri nokoki Tito nīchiano nō inimakōimis.

<sup>7</sup> Akka mā nokoki Tito nokoxō noko inimama noko yoia iskafakī: “Corinto anoafāfe ea inimakōiafo,” ixō Titopa noko yoia. Askara nō nikai nō inimakōia. Askatari noko yoia mā eōnoa yoikī iskafakī: “Nō Pablo shinākōi nokoki samamashta nokopainō,” ixō mā yoikē: “Nāskaxori nōko ōitinī nō shinā chanīma nō afara chakafamis. Akka nōkai anā askapaima. Nō Pablo shināi,” ixō mā

yoiaino Titopa ea yoia. Nã keskara nikai ã inimai finasharakõi.

<sup>8</sup> Akka ã mato kirika kenexõ manamakĩ ã mato shinãmitsamana. Nãskax ãri shinãmitsakõiyoa. Akka anã ã shinãmitsaima.

<sup>9</sup> Akka iskaratã ã inimakõi. Akka ã mato shinãmitsamanax ã inimaima. Akka mã shinãmitsayanã mã Epa Nios kĩfiti iskafakĩ: “Epa Niosi, nõ afara chakafakĩ noko raefafe nõ afara chakafamiski,” ixõ mã yoikĩ. Nãskakẽ ã inimasharakõimis. Mã askafaino Epa Niosri matoki inimasharakõi. Akka ã mato kirika kenexõ manamakĩ ã mato yoikĩ chakafaama. Askatamaroko ã mato yoisharakõia mato axosharayanã.

<sup>10</sup> Akka nõ shinãkĩ iskafatiro: “Ooa, ã afara chakafakĩ, Niosri ã chakafaa,” ixõ shinãkĩ nõko chaka nõ xatepaitiro Epa Nios Ifofapaikĩ. Nõ askaito õikĩ Epa Niospa noko ifitiro nõ afe ipaxanõ. Nãskaxõ nõ shinãtiroma iskafakĩ: “Ooa, ãfe chaka ã xateama shara ã ikerana. Niosri ã Ifofaama ã shara ikerana,” ixõ anori nõ shinãtiroma. Akka nã chanĩmara faamafãfe nõ shinãi keskara shinãkanima. Iskafakĩ shinãmisfo: “Ooa, nõ afara chakafaa,” ixõ shinãkani ãto õiti mẽra shinãmitsakanima Nioskai shinãpaikanima. Nãskax nakanax Epa Nios fe ipanakafoma.

<sup>11</sup> Akka mãkai askarama. Shinãkapo. Mã mãto õiti mẽraxõ mã mã shinã anã mã Nios Ifofai mãto chaka xatepaikĩ nã Niospa fichipaiyai keskafakĩ. Nãskax mã ratekõia Niospa keyokõi noko omiskõimaxira ikax. Nãskakẽ mã mã itipinĩkõia ika a afara chakafaifo ato omiskõimaxiki. Nãskaxõ mã fãsikõi ato yoia ãto chaka xatenõfo. Nãskakẽ mã mã noko isпамãkai ato keskarama.

Nāskakē mā ea fichisharapaikōi ē mato ōikanō mā isharakōiyamākī.

12 Akka ēfe kirika kene fixō mā ea noiyanā mā ea nikakōisharamis. Akka ē kirika keneama, nā feronāfāke afara chakafaaōnoa omiskōimakāfe ixō. Askatari nā feronāfāke omiskōimanafoōnoari ē kirika keneama. Akka ē mato kirika kenexona mā tāpinō mā ea noimākai. Akka mā ea nikakōimis. Nāskaxō mā tāpitiro māmāi ea noikī Niospa ferotafi.

13 Nāskakē nō inimasharakōi, māmāi noko noisharakōiaino nikakōisharayanā. Akka Titori matoōnoax inimasharayamea. Nā Tito inimaito ōi nōri inimaifinasharakōiyamea.

14 Akka Tito kayoamano ē yoiti iskafakī: “Na Corinto anoafō sharakōifo,” ixō ē yoiti. Nāskakē Tito mato mēra kaano mā ifisharakōiyamea. Nāskakē ē matoōnoax rāfiyameama. Akka chanīma fisti nō mato yoimis. Nā ē matoōnoa Tito yoia keskara chanīmakōi Titopa mato ōia.

15 Tito matoki nokoxō ōia mā rateaito mato ōita noko Titopa ferateneira ikax. Nāskakē pishta rateyanā mā Tito nikakōita. Nāskakē Titopa mato shinākī, mato noikī finakōi.

16 Ēri matoki inimakōi. Akka iskaratīa mē tāpia nā ē mato yoiai keskara mā amiskē.

## 8

*“Afarayaxō fetsafo ināsharakāfe,” ixō Pablo Corinto anoafō yoini*

<sup>1</sup> Akka meka fetsari ã mato yoinõ mã täpinõ. Mã Epa Nios Macedonia anoxõ chanĩmara faafono Epa Niospa ato noikĩ ãto shinã mēraxõ ato shinãmashara fetsafori kori inãsharakõinõfo.

<sup>2</sup> Akka Macedonia anoax omiskõifikakĩ Niosnoax inimakõikakĩ, afaayayamafiakaxõ nã yora afaamaisfo ato afara fetsa inãsharakõiafo.

<sup>3</sup> Akka nã ã õia keskara ã mato yoinõ. Fetsafãfe afaayayamafiakaxõ fetsafori ato afara ato inãsharakõiafo. Ato afaa fĩshkofafoma. Nãskakẽ atonã afaa ichapa nēteama.

<sup>4</sup> Iskafakĩ ea yoiãfo ato inãsharapaikĩ: “Nã Jesús chanĩmara faa fetsafãfe kori yopakani. Nãskakẽ nõri ato afara fomasharapai,” ea faafo.

<sup>5</sup> Nõ shinãyamea kori fistis noko inãkanira ixõ, Jerusalén anoãfo a Nios Ifoãfo ato foxopaikĩ. Akka noko kori inãyokaxoma taefakĩ Nios inãyameãfo, iskafakĩ yoiyanã: “Ifo, nõfi mefe yorakĩ nã mã noko afara amapaiyai keskara mã noko yoitiro,” ixõ yoiyameãfo. Nãnori yoikãta nokori yoiyameãfo iskafakakĩ Niospa fichipaiyai keskafakĩ: “Nõri nõ mato nikakõinõ,” ixõ noko yoiyameãfo.

<sup>6</sup> Titopa taefakĩ mato yoiyoni iskafakĩ: “Mãto korifo ichafakãfe a afaamaisfo Jerusalén anoãfo ato inãxikakĩ,” ixõ mato yoiyoni. Nãskakẽ nõ Tito yoiyameãfo iskafakĩ: “Nã mã yoimis keskafakĩ anã ato yoife nã afaamaisfo Jerusalén anoãfo ato kori inãnõfo. ‘Mã ato noikĩ mã ato kori inãtiro,’ Corinto anoãfo ato yoife,” ixõ nõ Tito yoiyameãfo.

<sup>7</sup> Akka mã Jesús chanĩmara fakĩ finakõiyannã mã Niospa meka mēstekõi yoimis, ãfe meka täpisharakõiyannã. Chanĩmakõi mã Jesús

yonoxosharakōiyanā mā noko noisharakōi. Nāskakē nā mā afarafo shara faa keskafakī nā afaamaisfori mā ato ināsharatiro. Niosxō mā ato noikōikī inimasharakōikai mā ato inātiro, fetsafo finōkōinīfofā nā mā imis keskayanā.

<sup>8</sup> Akka ěakōi ě mato yoima nā afaamaisfo mā ato kori inānō. Akka ě tāpipai fetsafāfe ato kori ināpaiyai keskafakī māri ato ināpaimākai. Askayamakī māto meka fistichi mā yoiaraka nō ato ināira ixō. Akka askakīma mā ato noikōiyanā mā ato ināsharatiro.

<sup>9</sup> Mā mā tāpia nōko Ifo Jesucristo nai mēranoax nāmā fotoyoamax afama mīshtifoya iyopaoni. Afaakai yopapaonima. Nāskafixō noko noikōikī āfe afama mīshtifo keyokōi potāferani. Nāskax nokoōnoax afaamais iyopaoni nō aōnoax isharapakexanō.

<sup>10</sup> Akka nā ě shināinoa ě mato yoinō mā tāpinō. Akka mā xinia fisti finōa mākai inimakōiyanā kori ichafaxō mā ato ināma. Akka taefakī nā afaamaisfo mā ato noikī mā ato kori ināpaikī mā fiyamea mā mekea ato chipo ināxiki.

<sup>11</sup> Nāskakē inimakōikī mā kori ichafakī taefati keskafakī iskaratīari inimayanā ato ināsharakāfe anā afaa yopanōfoma. Nā mā ato ināpaiyaiti ato inākāfe.

<sup>12</sup> Akka mā ato ināpaikī mā ato inātiro. Askatari mā afarayaxō mā ato ināsharaito Epa Niospa tāpia. Askatari mā afara ichapayaxoōma mā ato ināitori nāri Epa Niospa tāpia. Nāskakē inimakōi.

<sup>13-14</sup> Akka ě mato iskafakī yoima: “Ichapakōi ato inākāfe,” ixō ě mato yoima. “Askatari keyokōi mā ato ināx mā afayaima,” ixō ě mato yoiama. Akka iskaratīa mā afara ichapaya. Nāskakē

nã afara yopaifo mã ato inãtiro. Akka mãri afara yopaito nãfãfe afara ichapayakaxori matori inãtirofo. Mã askai mã ranã mã kexenõnãsharax mã isharakõitiro afaa yopaxikima.

<sup>15</sup> Akka kirika ano Niospa meka kenea iskai: “Akka nõko xinifo tsõa istomaxõ a piaifo Niospa ato inãpaoni. Akka nã ichapa fiato texefapaonima. Akka nã ichapama fiatori afaa yopapaonima,” ixõ kirika ano Niospa meka yõra keneni. Nãskakẽ yora fetsafo nõ afara inãito, Niospari noko afara fetsafo noko inãtiro nõ afaa yopayamanõ.

### *Tito fe rafeafo*

<sup>16</sup> Ë matoõnoa shinãkõiai keskafakĩ Titopari ãfe õiti mëraxõ mato shinãkõi, Epa Niospa shinãmanaino. Nãskakẽ nõ Epa Nioski inimakĩ nõ aicho fai.

<sup>17</sup> Akka iskafakĩ nõ yoiyamea: “Corinto anoafo anã ato õitãfe ato yoisharaxikĩ,” ixõ nõ Tito yoiyamea. Nãnori nõ yoiaino inimayamea. “Aicho, ã ato ari kaikai ã ato yoisharai kaikai,” ixõ noko yoiyamea. Akka ã shinãi nõ yoiyai fistiõnoax kaima. Æari matoki kasharapai kai.

<sup>18</sup> Akka nã nofeta Nios Ifofamis fetsa nõ Titoya nĩchi. Nã nofe yora, nãatori Jesúsnoa ato yoisharamis. Nãskakẽ aõnoa keyokõichi meka shara yoimisfo.

<sup>19</sup> Akka nã Nios chanĩmara faafo tiito ichanãkaxõ na feronãfake katonifo, nofeta nã kori yopaifo foxõikanõ. Nios shinãkĩ na kori nõ ato inãyanã nõko Ifo sharara fanõfo. Askatari nõ mato feta nõ ato inãpai tãpinõfo nõ ato axosharapai.

<sup>20-21</sup> Nã afaamaisfo nõ ato kori foxosharapai. Nãskakẽ yorafãfe ferotaifi nõ ato õimasharapai noko



chakafakĩ mekafayamanõfo. Na kori ichapa nõ ato foxosharapai noko iskafanõfoma: “Nõko kori ranãri oneafo,” noko fanõfoma. Nãskakẽ nõko Ifãfe ferotaifi nã yorafãfe ferotaifiri nõ ato õimapai nõ isharakõixõ.

<sup>22</sup> Akka nã nofe yora nã Jesús Ifofamis fetsa Tito yafi nõ mato nĩchi. Nã feronãfake mã nõ õimis nãato Jesús chanĩmara fakõimis. Nofeta Jesús yonoxosharakõimis. Akka nãato mato nikamis mã Jesús Ifofasharakõixõ nã afaamaisfo mã ato inãsharakõiaito. Nãskakẽ mato ari kapaimis mato feta ato shara faxiki.

<sup>23</sup> Akka mã mã Tito õimiski. Nãato efeta mato yonoxosharamiski. Nã efe rafemis Jesús yonosharaxoxiki. Nã Jesús chanĩmara faafo raferi afe mato ari fokani. Akka nã Jesús chanĩmara faafãfe ichanãkaxõ ato katonifo mato ari fonõfo. Nã rafeta Nios Ifofasharakõimisfo. Nãskakẽ ato katonifo mato ari fonõfo.

<sup>24</sup> Akka mato ari nokofaifãfe ato ifisharakõikãfe nã Nios Ifofaafo ato katonifo ato tãpinõfo mã ato ifisharaito. Mã ato askafaino nã ã matoõnoa yoisharamis keskara tãpitirofo chanĩmakõikẽ.

## 9

*Nã Nios Ifofaafãfe Corinto anoafõ feta Macedonia anoxõ nã Nios Ifofaa fetsafori ato kori manamanifo*

<sup>1-2</sup> Akka nono Macedonia anoxõ ã kirika kenexõ ã mato fomakĩ ã mato yoikĩ iskafapaima: “Ato kori fomakãfe,” ixõ ã mato yoipaima. Akka mẽ tãpia mã xinia fisti aka nã Jesús chanĩmara faa fetsafãfe afara yopaifãfe mã ato inãpaiyaito. Akka ã Macedonia anoafõ ã yoikĩ iskafaa: “Acaya anoxori

ato kori fomapaikani Judea anoafu,” ixõ ã yoia. Ë ato askafaito nikakaxõ akairi ato kori fomasharapaikani.

<sup>3</sup> Nãskakã ã Tito yafi nã afe rafeafu ã matoki nãchi nã ã matoõnoa yoisharai keskara chanĩmakõikã tãpinõfo. Ë Macedonia anoafu ato yoimis iskafakĩ: “Nã Corinto anoafãfe mã itipinĩshara faafu ato kori fomaxikakĩ,” ixõ ã ato yoia. Akka ã Tito yafi a afe rafeafu ã nãchi mato ano nokokaxõ õinõfo nã ã matoõnoa ato yoia keskara chanĩmamãkĩ.

<sup>4</sup> Akka Macedonia anoafuri efe foaifono ã ato fe mato ano nokoxõ õia mã kori ichafayamano ã mãto rãfiaino mãri mã rãfipaitiro.

<sup>5</sup> Nãskakã ã shinã Tito yafi afe rafeafu rekã mato ari nãchixiki mato feta kori itipinĩfanõfo ato fomaxikakĩ nã afaamaisfo. Akka afetĩama mã mã shinãxõ yoiyoni: “Nã afaamaisfo nõ ato kori fomanõ,” ixõ. Akka ã mato yoiamã: “Ato kori inãkãfe,” ixõ. Mãakõi mã ato inãi. Akka nãskara shara mã ato inãpaiki mã ato inãtiro.

<sup>6</sup> Nãskakã shinãsharakãfe. Akka nõ fimi exe fisti fanaxõ ichapa fitiroma. Akka nõ fimi exe ichapa fanano nõ fimi exe ichapa fitiro. Nãskarifiakĩ nõ fetsafu afara ichapama inãkã nokori Niospa ichapama inãxii. Akka nõ inimayanã fetsafu ichapa inãito nokori Niospa ichapa inãtiro.

<sup>7</sup> Nã ãto shinã mëraxõ shinãifo keskafakĩ fetsafu inãtirofo. Nãskakã iskafakĩ shinãtirofoma: “Ooa, ã ichapama inãpaifaifaito ea yõkarifaifaito ã inã.” Askatari iskafakĩ shinãtirofoma: “Akka ã inãyamaino ekeki õitifishkitiro. Akka ã inãi ekeki õitifishkiyamanõ,” ixõ anori shinãyamakãfe. Askatamaroko inimayanã inãkãfe. Nã fetsafu ato afara inãi inimamis nã Niospa noikõi.

<sup>8</sup> Akka nã mã fichipaiyai tii keyokõi Niospa mato inãtiro afara sharafo fetsa fetsatapafo mã afaa yopanõma. Askatari nã afara yopaifo mã ato inãno, Niospa keyokõi tãpia mato sharafa fafafãitiro mãri fetsafo shara fanõ.

<sup>9</sup> Niospa meka aõnoax kirikaki kenea is kai:

Feronãfake sharapa nã afaamaisfo afara ichapa ato inãsharamis. Nãskakẽ Epa Niospa nã feronãfake axosharaino mẽxotaima ato afara inãsharatiro,

ixõ kene ni.

<sup>10</sup> Niospa fimi exe fo onifani. Nãskakẽ nõ fimi exe fanatiro. Chipa Niospa ãfe fanafo foaimasharaxotiro pisharanõ. Nãskarifiakĩ mã afara yopaito Niospa mato inãsharatiro. Afara ichapakõi mato inãno mã inimayanã nã Nios Ifofaafo Jerusalén anoafõ mã inãsharafafãitiro.

<sup>11</sup> Chanĩma, Niospa mato afaa fĩshkoima afara ichapa mato inãĩ mãri ato afara ichapa inãno. Akka nã afara yopaifo mã ato inãĩ nãfo nõ ato foxoxii. Nãskakẽ inimayanã yoixikani iskafakĩ: “Aicho Epa Niosi, mã fãsi sharakõi,” ixõ yoixikani.

<sup>12</sup> Akka mã ato afara inãsharaino nã afaamaisfãfe fixikani. Nãskakẽ mã fĩkaxõ inimayanã Epa Nios yoixikani iskafakakĩ: “Aicho Epa Niosi, mã noko shara famis,” ixõ yoixikani.

<sup>13</sup> Mã ato afara inãsharano nã afaamaisfo ini-makõixikani mã ato inãsharano. Nãskakẽ yoikĩ iskafaxikani: “Aicho Epa Niosi, mã noko afara inãifãfe mã meka nikasharakõimisfo. Jesús nõko Ifo mia famisfo. Mã ato yoia keskafakĩ noko inãsharafo. Fetsafori nãfãfe afara ato inãsharafo. Nãskakẽ mã nõ ato tãpikõia chanĩmakõi mã Fake Jesús ãto Ifokõi,” ixõ nã afaamaisfãfe yoixikani.

14 Nāskakē mato Epa Nios kīfixoxikani. Mā Niosxō ato afara ināsharakē, yoikī iskafaxikani: “Epa Niosi, mīōxō na yorafāfe noko afara ināsharafo. Aicho Epa, nō ato fāsi noikōi. Atori shara fafe,” ixō mato Epa Nios kīfixoxikani.

15 Aicho Epa Niosi, mī Fake Jesucristo mī noko ināsharakōini nofe rafesharapakexanō. Nāfi shara-finakōiakī aōnoa nō yoisharapaikōi nōkai tāpiama afeskaxomāi nō yoisharakōinō.

## 10

*“Niospa ea nīchini Jesúsnoa ē mato yoinō” ixō Pablo ato yoini*

1 Iskaratīari meka fetsari ē mato yoisharapai. Efe yora mīshtichi, ea nikasharakāfe. Jesucristokai meka mitsisipato noko yoimisma. Noko yoikī fenāmāshta noko yoisharamis nō āfe meka nikasharakōinō. Nāskarifiakī ēri Cristoōxō mato fenāmāshta yoisharapai mā tāpinō. Akka eōnoa yoikī iskafamisfo: “Pablo nofe ixō fenāmāshta noko yoiaito nō ōimis. Nāskafixō noko kirika kenexoni mitsisipakai noko kirika kenexonaito nō ōimis,” ixō ea yoimisfo.

2 Ē matoki nokoxō fāsi mekakai ē ato yoipaima ea nikanōfo. Askafixō ea nikayamafiaifono fāsi kerexkai ē ato yoitiro. Akka nā ea chakafakakī mekaififo ato nikayamakāfe. Akka eōnoa yoi iskafamisfo āa chanīkani iskakani: “Pablo noko yoi nā Nios Ifofaamafāfe yoiaino keskara. Niospa shināōxōkai noko yoima,” ixō yoimisfo. Akka ē matoki nokoxō ē mato yoitiro nā Nios Ifofaamafāfe shināifo keskara ē mato yoimisma. Niospa

shināi keskara fisti ẽ mato yoimis. Akka mẽ nokoxõ fãsi mekakai ẽ ato yoixii tãpinõfo.

<sup>3</sup> Chanĩma, nono mai ano nõ ika nã Nios Ifofaafoma fe. Akka nã Nios chanĩmara faamafãfe fet-safo finõpaiyaifo keskai nõkai askamisma nã noko noikaspaifo ato finõxiki.

<sup>4</sup> Akka a Nios Ifofaafoma a Satanás nikakĩ mato chanĩkĩ tãpimapaikani mã anã Jesús Ifofayamanõ. Mato pãrapaikani. “Nõ Nios Ifofara,” ikani. Askatamaroko nõ Nios nikakĩ nõ mẽxotaima yoimis chanĩmakõi. Nãskaxõ Nios ãfe sharaõxõ nõ ato xatematiro afara chaka anã yoiyamanõfo.

<sup>5</sup> Epa Niospa noko yoiaino nõ fetsafo tãpimatiro ãa chanĩaifo, “Nõ Niospa meka tãpisharakõiakĩ,” ikanaifo, kakapaiyaifo. Akka nõ Niospa sharaõxõ fetsafo nõ ato tãpimatiro nã chanĩmisfo Niospa meka tãpisharafoma. Shara shinãfoma. Epa Nios Ifofaima. Niosxõ nõ ato yoimis Nios Ifofanõfo.

<sup>6</sup> Akka ea Jesús nĩchini ãfe meka ẽ mato yoinõ. Nãskakẽ mã Jesús yafi ea nikakõixõ mã anã afaa chakafayamaino ẽ mato afeskafatiroma. Akka mã noko nikakaspaito ẽ mato omiskõimatiro.

<sup>7</sup> Akka mã õikĩ shināi oa shara keskaraxõ fetsafãfe yoiiaifono iskafakĩ: “Cristo ea nĩchini ãfe meka ẽ mato yoinõ. Akka Pablokai ea keskarama,” ixõ mato yoimisfo. Akka nãfãfe shinãsharakaxõ tãpitirofo eari Cristo nĩchinikẽ ãfe meka shara ẽ mato yoinõ.

<sup>8</sup> Nõko Ifo Jesús ea yoimis keskara ẽ mato yoitiro. Mato afaa chakafamatama nõko Ifo ẽ mato Ifofamasharapai mato õiti fẽpeaxosharaxiki. Ẽ anori mato yoi ẽa kakapaitama, ẽroko mato yoisharapai. Ẽ anori mato yoikai ẽ rãfima.

<sup>9</sup> Akka ã mato kirika kenexõ ã mato ratepaima mã mesenõma.

<sup>10</sup> Akka fetsafãferi eõnoa yoikĩ iskafamisfo: “Pablo noko kirika kenexokĩ noko feratekõiaito nõ õimis. Akka askafiax nofe ikẽ nõ õia afaamakõi nõ õimis. Afe mekakai mitsisipama,” ixõ eõnoa yoimisfo.

<sup>11</sup> Nãnori eõnoa yoifimisfono ã mato ari samama kaxõ ã ato tãpimaxii. Nã ã mato kenexona keskakakĩ nãnorikõi ã mato yoixii.

<sup>12</sup> Fetsafãfe mato yoimisfo iskakakĩ: “Nõfi afara tãpikõiakĩ nõ mato tãpimasharakõitiro,” ixõ mato yoimisfo. Nãskarafo ichanãkanax ãa ranã yoinãkani iskakani: “Noko keskarakai tsoama. Nores fisti nõ tãpisharakõia,” ikanax kakapaimisfo. Nãfo tatimakõifo afaakai tãpiafoma. Nãskakaxõ nãfãfe anorima afara chaka yoimisfo. Akka ãkai ato keskarax ã sharakõi ã itiroma ãroko ato keskarax.

<sup>13</sup> Akka nõkai anori yoipaitiroma. Nã Niospa noko yoiai keskara fisti nõ mato yoitiro. Noko yoini ãfe meka shara fisti nõ mato yoinõ. Nã fisti nõ mato yoimis. Akka mã ika nã Niospa ea nĩchini ano. Akka ã kani Corinto anoxõ mato Niospa meka tãpimaxiki.

<sup>14</sup> Nãskakẽ ori fetsa ari ã kanima, nã ea nĩchini ano ã kani. Akka nã nõ mato yoiai keskara chanĩmakõi. Nõkai kakapaimisma. Nã Niospa noko yoiai keskara fisti nõ mato yoitiro. Akka nõ mato Niospa meka yoikĩ taefatani Jesucristoõnoa meka shara mã nikamiskẽma.

<sup>15</sup> Akka nã ã kamisma anoxõ fetsafãfe ato yoiafono nõ ato yoia ixõ nõ ato yoimisma. Akka nõ mato yoi nã nõ mato afara axosharamis fistiõnoa. Akka nã fetsafãfe mato axomisfoõnoa

nō yoimisma. Akka mā mā Jesús nikasharai. Nāskapainō. Mēxotaima mā nikasharakōifafainō. Akka mā ea ifisharakōiano mēxotaima ẽ mato yoisharatiro nā Niospa fichipaiyai keskafakī.

<sup>16</sup> Nāskakē mai fetsa ari chaikōi mato finōfāi ẽ kapai Jesúsnoa ato yoixiki nā Niospa meka nikamisfoma ari. Akka nārixō mā fetsafāfe ato yoiafono nō ato yoia, nō ipaima fetsafo imis keskai. Nōkai fetsafo ato yono xītikapaima.

<sup>17</sup> Akka kirika ano Niospa meka kenea iskai: “Akka tsōakai āa yoimesharatiroma iskai ẽ afama mīshti tāpikōiakī ikax āa kakapaitiroma. Askatamaroko nō yoisharatiro nā afara sharafo nōko Ifāfe aka,” ixō kirika ano yōra kenenī.

<sup>18</sup> Akka fetsa āa yoimesharai akai afaama. Akikikai Nios inimatiroma. Akka Niospa fetsa na feronāfake sharakōi faax akiki inimakōitiro.

## 11

*Pablo ato yōani āa chanīkani noko Niospa nīchiaki nō Niospa meka mato yoinō imisfoōnoa*

<sup>1</sup> Iskaratīa ẽ mato yoinō, nā yora shināsharayamaito yoiai keskara nānorikōi ẽ mato yoifikīkai askarakōi ẽ mato yoima. Nā mā ea nikamis keskafakī iskaratīa ea nikasharakāfe.

<sup>2</sup> Feronāfake kēroyapaikī āfe apa yōkatiro, nā kēro fixiki āfe āfi inō. Nāskakē apa āfe fake xotofake kexesharatiro feronāfake fetsa fe oxayamanō. Nāskax mā fianākanax fene fes fianātirofo feronāfake fetsafekairoko oxakatsaxakī. Nāskarifiakī ẽ mato Nios Ifofamakī ẽ mato kexesharani. Nāskaramāi Epa Niospa fichipaiyaino. Nāskakē mēxotaima ẽ mato kexesharai mā fetsafo

nā chanĩmisfo mā ato nikayamanõ. Nāskakẽ mā nai mēra Nios ano kaax Cristo afe yorakõi mā ixii.

<sup>3</sup> Nāskakẽ ẽ shināchakakõi Satanás Eva ani keskafakĩ fetsafāfe matori pārayamanõfo, mato pāraifono mā anā Cristo noinõma.

<sup>4</sup> Ooa. Fetsafāfe mato pārapaikani. Nõ Jesúsnoa mato yoimis keskara anori mato yoikõiyamafiaifono mākai ato xatematama mā ato chanĩmara fai. Nõ Niospa Yõshi Sharaõxõ meka shara Jesúsnoa nõ mato yoimis keskara anorikai afāfe yoikanima. Jesúsnoa anorima mato yoifiaifono mā ato xatemanama. Mā ato nikayanā mā yoimis iskafakĩ: “Aicho, mā nofe isharapainõ,” ixõ mā ato yoimis.

<sup>5</sup> Akka mā shināi nāfāfe Niospa meka yoisharakõimisfora ixõ. Akka askafikaxõ ea finõfafoma.

<sup>6</sup> Akka, ¿mā shināimẽ ẽ yoisharatiroma? Akka ẽ Niospa meka tãpisharakõia. Nā ẽ mato yoiai anori mēstekõi. Mā mā ea tãpikõia ẽ mato Niospa meka xafakĩakõi yoimis. Nā keskara ẽ mato õimafafāini.

<sup>7</sup> Nā ẽ mato Niospa meka yoimis chāikai ẽ mato afaa yõkamisma. Êkai mato afaa fīamisma, koriri ẽ mato yõkamisma. Õitsai, ẽ mato chakafairaka ẽ mato kori fīakĩma. Akka ẽ Niospa meka shara Jesúsnoa ẽ mato yoimis Niospa fakefo mā inõ. Ê mato askafai afaamais keskara ẽ imis mā Niospa meka tãpisharakõinõ.

<sup>8</sup> Akka ẽ mato fe ikano nā Nios chanĩmara faa fetsafāfe ea kori inānifo aõ nā ẽ fichipaiyai keskara ẽ finõ. Õitsai, ẽ atoki yometsoa keskararaka nā kori fi mato Niospa meka yoi, ẽ mato yonoxomis



keskaraxõ.

<sup>9</sup> Ë mato fe imis chãikai ã afara yopafikĩ ã mato fekaxtefamisma. Akka Macedonia anoafãfe Nios chanĩmara faafo fẽkaxõ ea afarafo inãnifo. Akka ã mato fe imis chãikai ã tsoa afaa yõkamisma. Askatari ã tsoa afaa yõkapakenakama.

<sup>10</sup> Cristo ãfe meka chanĩmakõi. Nãskarari nã ã mato yoiari chanĩmakõi. Nãskakẽ Acaya mai anoxõ nã ã mato yoiari keskara ea tsõa xatematiroma.

<sup>11</sup> Ë mato anori yoikĩ, ¿ã mato noimamẽ? Maa. Anorikaima Niospa tãpikõia ã mato noikõi.

<sup>12</sup> Nã ã mato yonoxomis chã ã mato afaa fiapaimisma. Iskaratĩari ã mato afaa yõkaima. Nãskaxos ã mato yonoxoni nã chanĩmisfo mã anã ato chanĩmara fanõma. Nã ã yonoaito õikaxõ fetsafãfe yoimisfo iskakakĩ: “Nõri Pablo yonoari keskafakĩ nõ yonoi,” ifiakaxõ afãfekai ã yonoari keskafakĩ tsõa yonomisma.

<sup>13</sup> Akka nãfo chanĩmisfo. Ë ikai keskara ipaifikani tsoa askakõimisma. “Cristo noko nĩchia aõnoa ãfe meka nõ mato yoinõ,” ixõ mato yoifikani afokai Cristo fe rafemisfoma.

<sup>14</sup> Chanĩma, Satanás nokoki nokotiro nã Niospa ãfe ãjiri fafeai õitsa. Nãskarato noko yoitiro iskafakĩ: “Ëfi mato xafakĩa yoikai,” ixõ noko feparapaitiro.

<sup>15</sup> Akka nã Satanás yonoxomisfori nã keskara itirofo. “Nõri nõ Nios yonosharaxomis,” ixõ noko pãrapaikani. Nãskaifãfe õikĩ Niospa ato omiskõimakĩ finakõixii. Nãskakẽ nãfãfe afara chakafakanax omiskõipakenakafo.

*Pablo omiskõini Niospa meka yoikatsaxakĩ*

16 Ē mato yoia keskara anā ē mato yoinō: “Pablo afaa tāpiama,” ixō eōnoa shināyamakāfe. Akka ea nikapaikī ea nikayokāfe. Nā yora fetsa afaa tāpiama mā nikamis keskafakī eari nikasharayokāfe. Ēari ē pishta yoimeyonō.

17 Nā ē mato yoiai keskara a ēa ē yoimesharai ēfe Ifāfe ea anori yoiamā. Akka nā afaa tāpīamāfāfe anori yoimisfo.

18 Akka nā nōko Ifo chanīmara faafoma āa yoimesharaifo keskara nānori fetsafāfe mato yoimisfo. Akka iskaratīari ē mato yoi a ēari ē yoimesharai keskara.

19 Akka mā shināi mā tāpikōia. Nāskaxō nā afaa tāpīamafo mā ato nikamis. Akka afeskakī mato anorima yoifiaifono mā ato xatemamisma.

20 Mato yoimisfo āto yonomati keskarakōi mato fakaxō, askatari mato kaxpa yonomamisfo. Nāskatari mato pāramisfo, askatari mato chakafamisfo, askatari mato ĭchamisfo. Mato askafaifono mā tenekōimis.

21 Mato askafakakī shinākaniraka nō mitsisipakōira ikaxō. Ooa. Nōkai mitsisipama oa ato akaifo keskafakī nōri mato askafapanā. Akka nōkai mato askafamisma nōkairoko ato keskaraxō.

Akka nāfo āa yoimesharakakī mato afara yoimisfo keskafakī ēari ē yoimesharatiro. Ooa. Nā afaa tāpīamafo keskaraxō anā ē mato yoi.

22 Akka nāfo, “Nō hebreos yorafo,” ikani. Akka ēri hebreo yora. Askatari, “Nō israeli yorafo,” ikani. Akka ēri israeli yora. Askatari, “Nō Abraham āfe fena,” ikani. Akka ēri Abraham āfe fena.

23 Akka, ĩnāfo fistimē Jesucristo yonoxomisfo? Maa. Akka ěroko yonoxokī finakōimis. Ooa. Ē

iskafakī ē mato yoi oa shināsharayamaito yoiai keskaraxō ē mekai askayamapaifi. Akka nā chanīmisfāfe mato yoikī iskafakani: “Nō Jesús yonoxokōimis. Askatari Jesúsxō noko karaxa mēra ikimanafo,” imisfo. Akka ēroko yonokī finakōimis. Nāskakē earoko karaxa mēra ikimakī finakōimisfo. Askatari ea koshakī finakōimisfo. Ea askafakī fet-saifono mē nakerakōimis.

<sup>24</sup> Efe yora judeofāfe ea koshakakī cinco veces fakī ea koshamisfo. Nā ea kohaifo tii treinta y nueve ea famisfo.

<sup>25</sup> Romano xanīfofofāferi āto chāti ea koshanifo tres veces fakī. Askatari ēfe kaifāferi tokirifāfe ea tsakakī fisti fanifo. Askatari kanōanāfānē ē pokefainaino kanōanāfā fakafā fospia ikiaino mē āsakerani. Mā kanōanāfā fakafā mēra ikiano nā kanōanāfā āfe kaxke ē fakafā mānāo ē nononi āsaxikima. Fakish fisti ita pena fistiri ē ini.

<sup>26</sup> Mē kafāsamis, faka faiyaito mesekōi ē ōimis; askatari yometsoafāfe ea achikaxō ea mesenifaifono mē ōimis; askatari ēfe kaifokōifāfe ea mesenifaifono mē ōimis; yora fetsafāferi ea mesenifaifono mē ōimis; pexefā rasi anoxori ea mesenifaifono mē ōimis; tsōa istomaxori ea mesenifaifono mē ōimis; fakafā anoari mesekōi mē ōimis; “Nōri Nios Ifo sharakōifamis,” ikax a chanīmisfāfe ea mesenifaifonori mē ōimis.

<sup>27</sup> Ē omiskōiyanā ē yonomis xokenākōiyanā; askatari ē oxa tenekōimis; askatari ē fonāiyanā nomi tenekōimis; askatari ē pimisma; askatari matsi mei ē omiskōikōimis rapatimais ikax.

<sup>28</sup> Nāskarafo ē mei ē omiskōikōimis. Askatari afara fetsafoōnoaxri ē omiskōimis. Askatari mēxotaima ē mato shinākōimis nā mā ichanāxō keyokōichi mā nōko Ifo Jesús Ifofamis tii mā

kachikiri fayamanõ.

<sup>29</sup> Akka ã nika fẽtsa Jesús Ifofasharapaifi rateaino ã aõxõ shinãchakakõitiro. Akka fẽtsa a Nios Ifofaa afara chakafamakẽ ã akiki õitifishkiki rãfikõitiro.

<sup>30</sup> Akka nã ã mato rama yoiã keskara kakapaikĩ ã mato yoima. Ë mato yoi mã tãpinõ ãa ã afaa atiroma.

<sup>31</sup> Nã Nios fisti nõko Ifo Jesucristo ãfe Apa, nãato tãpikõia ãkai chanĩmista. Iskafakĩ nõ yoinõ: “Epa Niospa, mã sharafinakõia,” ixõ nõ yoipakexanõ.

<sup>32</sup> Akka Aritas xanĩfokõi iyopaoni. Nã Aritas fetsa nĩchini Damasco anoax xanĩfo inõ. Damasco ano ã ikano, nãato ãfe sorarofõ yoini nã pexe rasi anoxõ ãfe kãiti anoxõ ea kexenõfo ea achixikakĩ.

<sup>33</sup> Akka anoxõ ea achipaiyaifono, nã nõko Ifo Jesús Ifofaafãfe fẽta efapa mẽra ea onekaxõ pexe rasi kene fomãkĩaxõ ea fotomanifo ã katanõ.

## 12

*Pablo ãfe namapa õiai keskara õini Niospa tãpimanaino*

<sup>1</sup> Akka ãa ã yoimesharai. A ãa ã yoimesharai keskarakai akai afaama. Nãskafekẽ nõko Ifo Jesús ea õimana keskara ã mato yoinõ. Nã ãfe namapa ã õiai keskara ea õimana. Nã tsõa nikamista ea tãpimani. Nãnorĩ ã mato yoi.

<sup>2</sup> Mã catorce xinia finõa a Niospa ea ifirisafayoni, ã Cristo fe rafeaito õikĩ. Ëkai tãpiama ãfe fero mẽsho fisti nai mẽra kani rakikĩa, askayamai ãfe yora kani rakikĩa. Nios fistichi tãpia a ã ini keskara.

<sup>3-4</sup> Niospa nã ika ano ea ifirisafayoni. Nã ã mato yoiyoa keskara anã ã mato yoi. Ëfe yora iyamai

ēfe fero mēsho fisti kani rakikīa ēkai tāpiama. Nios fistichi tāpia nā ē ini keskara. Nā ika anoxō ea afara nikamani keskara ē tsoa yoitiroma. Akka ea yoikī iskafani: “A mī nika keskara tsoa yoiyamafe,” ixō ea Niospa yoini.

<sup>5</sup> Ē nā ōia keskara ē fetsafo yoipaima iskafakī: “Niospa ea fisti nā ika ari ea ōimani,” ixō ē yoitiroma. Ē anori yoipaima. Anori ē yoi kaka-paimis ē itiro. Ēkai ēa ē yoimesharapaima. Ereskai ē afaa fatiroma. Nāskakē nā fisti ē yoimis inimakī.

<sup>6</sup> Akka ēa ē yoimesharai ē yoimetiro. Ē anori yoi nā yora afaa tāpiamafāfe yoimisfo keskara ē yoima. Chanīmakōi eōnoa ē yoimesharatiro. Akka ēakai eōnoa ē yoimesharapaima eōnoa shinākī finakōinōfoma. Mā ea ōimis ē afe keskaramākī, askatari mā ea nikamis ē afe keskara yoimismākī.

<sup>7</sup> Akka Epa Niospa a ika ari ea ōimani keskara tsōa ōimisma. Akka Niospa ea ōimaniōnoax ēa ē yoimesharapaitiro ē tāpikōiara ikax. Nāskakē Niospa nētefayamano Satanás ea isinī imani nā nō moxaki chachiano noko mōxa fekaxtefai keskafakī ēa ē yoimesharayamanō.

<sup>8</sup> Nāskakē ē kīfikī iskafani: “Ifo, ea sharafafe,” ixō tres ves fakī ē yōkani.

<sup>9</sup> Ē askafaito nōko Ifāfe ea kemakī iskafani: “Ē mia noi. Askafixō ē mia sharafaima. Cristo mia axotiro na pae mī tenenō ē mefe rafekakaini. Mī mitsisipayamafikē ē mīōxō ē ato ōimatiro ē afama mīshti fatiro,” ixō ea kemani. Nāskakē ē isinī ifiai ē inimasharakakaini.

<sup>10</sup> Nāskakē ē mitsisipayamaflax Jesu-cristoōnoax ē inimakōi. Nāskaxō ea īchaifono ē tenemis, afaayayamaxri ē inimakōimis

ea omiskōimanaifonori ẽ tenemis. Nãskatari afarafo fekaxkōifekẽ ẽ tenemis. Ẽ askafakĩ ẽ mitsisipayamafixō Jesucristoõxō ẽ afama mĩshti fatiro.

*Pablo nã Nios chanĩmara faafo Corinto anoafo ato shinãkōini*

<sup>11</sup> Akka nã yora afaa tãpíamafõ ãa yoimetirofo keskarax ẽa ẽ yoimea. Akka mã eõnoa afaa yoisharama. Akka mã ea õisharakĩ, “Nã Pablo sharakõi,” ixõ mã eõnoa yoiano nã sharakõi ikerana. Nãskakẽ ẽa ẽ yoimesharakõi fetsafãfe ea tãpinõfo ẽ afe keskaramãki. Akka ẽakai ẽ afaa asharatiroma. Ẽkai afaama. Nãskafekẽ nã eõnoa afara chaka mato yoimifãfe ea finõkanima.

<sup>12</sup> Jesucristo ea nĩchini aõxõ ãfe meka ẽ mato yoinõ. Nãskakẽ tanaimakõi ẽ yonomis fena fenakima. Nãskara ẽ yonofaino Niospa afama mĩshti amis eõxõ mã tãpinõ Jesucristo ea nĩchinikẽ.

<sup>13</sup> Akka, ¿afeskakĩ mã iskafakĩ shinãimẽ? “Pablo nã Nios chanĩmara faa fetsafo ato shara fai keskafakĩ nokori shara faima,” ixõ mã eõnoa yoitiroma. Akka nã Nios chanĩmara faa fetsafori ẽ ato shara fai keskafakĩ, nãskarifikĩ ẽ mato sharafa fafãfãini. Ẽkai mato afaa fĩapaimisma. Askatari ẽ mato fekaxtefamisma. Ea pimakape ea rapati safemayanã ẽ mato famisma. Ẽitsai, ẽ mato afaa fĩapaikima ẽ mato chakafaamakĩ ea raefakãfe.

<sup>14</sup> Mẽ mato ari kai rafea. Akka iskaratĩa mẽ itipinĩsharax anã ẽ mato ari kai. Ẽ mato amis keskafakĩ anã ẽ mato yõkakĩ fekaxtefaima. Ẽ mato afaa fĩapaitama ẽroko mato shinãfãfãini. Shinãkapo. Fakefãfekai apa yafi afa pimatiroma. Akka afa fetaroko apa fakefo pimatiro. Akka mãfi ẽfe

fakēkōifo keskarakī. Akka ē mato Niospa meka tāpimasharakōia eōnoax mā isharanō.

<sup>15</sup> Akka ē afarafo fikī mē kori potakī keyokōia, askafafiāxō ē shināchakaima, askatari ēakōi ē ināmei mā Niosnoax isharakōinō. Akka ē mato noikī finasharakōifianokai ōitsai mā ea noikī finasharakōimisma rakikīa.

<sup>16</sup> Akka ē mato afaa yōkamisma. Akka fetsafāfe mā Corinto anoafāfe eōnoa yoimisfo iskafakakī: “Akka mā nō tāpia Pablo mato afaa yōkamisma. Askafixō mato pāraxō mato kori fīamis, Judea anoafō ē ato foxotanōra,” ixō.

<sup>17</sup> ¿Nā feronāfakefo ē matoki nīchinioxō ē mato pāramē ē mato kori fīaxiki? Maa.

<sup>18</sup> Ē Tito yoini iskafakī: “Corinto ano katāfe,” ixō ē yoini. Nā nōko Ifo chanīmara faa fetsafori ē matoki nīchini. Akka, ¿Titopa mato pāramē mato afara fīaxiki? Maa. Mē tāpia Titopakai mato afaa fiapaimisma. Nā ē mato fe imis keskai ari mato fe imis. Noko rafeta nō mato yoimis. Nāskara fisti nō mato afara shara faxopai noko rafe nō mato fe imis.

<sup>19</sup> Mā shināiraka ē mato yoiai keskara mā eōnoa shināsharanō. Maa. Anorikaima. Epa Niospa nā ē yoiai keskara ea nikamis Cristo ea shināmanaino. Efe yora mīshtichi, nā ē mato yoiai keskafakī ē mato shara fapai Jesús shināi keskafakī māri mā shināsharanō.

<sup>20</sup> Akka ē tāpiama, ōitsai, ē ari nokoxō ōia a ē yoiai keskai mā isharayamakē ē mato fichikai. Askatari ē matoki nokoaino ōitsai, mā ekeki ini-maima rakikīa nā mā shināi keskai. Akka ē matoki nokoxō ōipai mā mā chaka xatexō mā Jesús Ifofasharaino. Akka ē matoki nokoxō ōia mā

chaka xateyamano ě shināmitsatiro. Mā fochishpanā faatanāta, fĕtsa fiaiti mārifi mā fipaita, fetsa mekafata, ōitifishkita, mares fisti mā fipaita, mā chanĭta, fetsafo mekafata, nō tsoa keskarama ita, isharayamata, mā askaito ě mato ōipaima.

<sup>21</sup> Nāskatari ě shināchakakōi, shināyanā ōitsai Niospa atoōxō ea rāfimaniraka ixō ě shināi mā isharayamaino. Mā askaino ě matoki nokoax ě rāfikōixii mā afara chakafaino. Akka ranāri mā isharapaonima. Māto āfima fe mā oxa-paoni. Askatari kērofori āto fenema fe oxa-paonifo. Nāskatari afara chakafo fetsa fetsatapafō mā apaoni. Akka mā xateyamaino ě nokoax ě mato ōi ě shināmitsakōixii, rāfikōiyanā.

## 13

*Pablo iskafakĭ ato yoini: “Anā afaa chakafayamakāfe,” ixō ato yoini*

<sup>1</sup> Mē mato ōikĭ rafe faa. Iskaratĭari anā ě mato ōikaikai. Ē anā mato ōikaikai mā māto chaka mā xateamākĭ. Akka kirika ano Epa Niospa meka kenenifo iskafakĭ: “Fĕtsa afara chakafaito ōixō yōfaito, ‘Nato afara chakafaa,’ ixō rafeta yoiaino, askayamakĭ trespa yoiaino askayamakĭ ranāfai yoiaino chanĭmara nō fatiro,” ixō kirika ano Niospa meka kenenifo. Nāskafakĭri ě mato ano nokoxō ě nikai mā afara chakafaito mā afara chaka xateyamaito. Akka ě mato ōitiro mā chaka ikamāki, askayamai shara mā ikamāki.

<sup>2</sup> Akka anā ě mato ano kayoxō mē mato yoiyoni mā afara chakafanōma. “Mā afara chakafakĭ xateyamaino ě mato omiskōimaxii,” ixō ě mato yoiyoni. Anā iskaratĭari chai ixō ě mato yoi kirika



kenexõ iskafakĩ: “Ë anã kaxõ ã mato õikai mã mã chaka xateamãki. Akka mã chaka xateya-maito ã mato omiskõimaxii. Akka tsoa pishtakai ã finõmaxima.”

<sup>3</sup> Akka mã tãpipai Cristo eõxõ mato yoiaino. Chanĩma, mã samama tãpinõ xafakĩakõĩ ã mato õimani. Akka ãakai ã mato yoima, Cristoõxõ ã mato yoi. Jesucristo mitsisipakõikai mato tãpimani mãto chaka mã xatenõ.

<sup>4</sup> Chanĩma, Jesucristo nokoõxõ ifi cruz ikakĩ mastafono nã feronãfake pachikõĩ keskara ini. Nokoõnoax nai ãakai ifimenima. Nãskafinixakĩ iskaratĩa Niospa sharaõnoax nia. Nãskarifiã nõri mitsisipama. Nãskafixõ Jesús feta nã Niospa apaiyai keskara nõ atiro Epa Niospa sharaõxõ.

<sup>5</sup> Akka mãto shinã mēraxõ shinãsharakãfe chanĩmamãki mã mã Jesús Ifofasharamãki. Mãa tãpimesharakãfe. Akka, ¿mã mã tãpiamē Jesucristo mato fe ikano? Askayamai mã mã chanĩmis rakikĩa nõ Jesús Ifofaira ifiaxõ mã Ifofaama.

<sup>6</sup> Akka mã mã ea õikĩ tãpia ã Jesucristoõxõ yonosharakõimiskē mato mēraxõ. Nã mã chanĩmara fakõipainõ.

<sup>7</sup> Ë mato Epa Nios kĩfixomis mã afaa chakafanõma. Nokoõnoa shinãnõfo ixokai ã Epa Nios kĩfimisma. Iskafakĩ fetsafãfe nokoõnoa shinãkani rakikĩa: “Pablo fe rafeafãfe ato yonoxosharafoma,” ixõ nokoõnoa yoikani rakikĩa. Akka noko askafafiaifono mã Jesús Ifosharakõifai nãskara nõ fichipai.

<sup>8</sup> Akka Niospa meka shara fistiõnoa nõ yoitiro. Aõnoakai meka chaka nõ yoitiroma ãfe mekamã sharakõikē.

<sup>9</sup> Akka fetsafãfe nõ afama noko askafakĩ

shinãfiaifono nõ shinãchakaima. Akka mã Jesúsnoax isharakõikẽ nõ fãsi inimakõitiro. Akka nõ mato Epa Nios kîfixona mã a keskara sharakõi inõ.

<sup>10</sup> Akka ã mato kirika kenexona mato ari kayox-oma mã ea nikanõ. Mẽ mato ari nokoxõ õia mã Cristo Ifo sharakõifaino ã mato õitoshinõ. Nãskakẽ mã isharakõiaino Niosxõ fãsi mekakai ã mato yoima mã isharakõinõ. Epa Niospa ea yoia ã mato yoisharanõ mã Nios Ifo sharakõifanõ isharakõixõ.

*Mã Pablo ãfe meka xatekĩ ato yoisharani*

<sup>11</sup> Mẽ mekai xatekĩ ã mato yoisharai. Jesús keskara isharakãfe. Ea nikasharakãfe. Nãnori fisti shinãkãfe. Isharakãfe. Mã askaino Niospa mato noikõikĩ mato inimamasharai ãfe Yõshi Sharaõxõ mato fe ixõ.

<sup>12</sup> Keyokõi nã mã Nios Ifofaa tii yoinõnãsharakãfe.

<sup>13</sup> Keyokõi nõko Ifo Jesús chanĩmara faafãfe nã efe ikafãfe mato yoisharapaikani.

<sup>14</sup> Nõko Ifo Jesucristo mato axosharapai. Epa Niospari mato noikõi. Niospa Yõshi Shara mato fe rafepakexanõ. Nã tii.

*Ëkĩa Pablo*

**Niospa meka fena Jesucristo<sup>noa</sup>**  
**New Testament in Yaminahua (PE:yaa:Yaminahua)**

copyright © 2008 Wycliffe Bible Translators, Inc.

Language: Yaminahua

Translation by: Wycliffe Bible Translators, Inc.

Yaminahua [yaa], Peru

**Copyright Information**

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Yaminahua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

---

PDF generated using Haiola and XeLaTeX on 18 Apr 2025 from source files  
dated 29 Jan 2022

6c7b7ce2-9d87-5405-91e6-71ce1387adcc